

Ny Valosoa sy hadihady

Olom-pirenena tsotra Rajoelina manomboka anio

Rehefa avy nanambara tao amin'ny Palais des Sports Mahamasina fa kandida Rajoelina Andry Nirina dia nametraka ny taratasy firosahany ho fidiana tao amin'ny Fitsarana Avo momba Lalampnanorenana (HCC), ny nomeny fahefana amin'izany ka noraisin'ity andrim-panjakana ity satria, angamba, feno sady azo noraisina izany. Raha ny voarakitra ao anaty Lalampnanorenana anefa dia raha vao manambara ny maha kandida azy ny filohan'ny Repoblika am-perinasa dia manala ny tenany amin'izany andraikitra izany ka miverina ho olom-pirenena tsotra (frantsay raha Rajoelina Andry Nirina amin'izao fotoana izao). Mitombona izany ny sihosi-hon-dresaka nilaza fa nosoniavin'ny ministry ny Fitsarana ny taratasy milaza ny fananan-dRajoelina Andry Nirina ny zom-pirenena Malagasy (Certificat de Nationalité). Heverina fa efa fantatry ny ao amin'ny Fitsarana Avo momba ny Lalampnanorenana ny fisin'izany toe-javatra izany, ka tsy tokony noraisiny ny firosahan-dRajoelina Andry Nirina satria raha amin'ny famoahana ny lisitr'ireo azo ekena ho kandida vao hanambara ny ao amin'ity Andrim-panjakana ity fa « Tsy Gasy fa Vazaha izy » ka tsy ho anisan'ny mpifaninana. Efa tsy ara-dalana izany ka raha mbola hitohy ihany ny bontolo dia azo inoana fa hizotra any amin'ny famerenana ny fahefana ho eo am-pelatanan' ny vahoaka Malagasy nampindrana izany tamin-dRajoelina Andry Nirina vazaha. Efa tsy tambo isaina intsony ny fanitsakitsahan-dalana sy ny tsy fiarovana ny fiandrianam-pirenena nataon'izao fitondrana izao, feno ny kapoaka satria mandady amin'ny tany ny Malagasy vokatr'izany. Anio sabotsy 09 septambra 2023 ny « teboka tsy azo iverenana intsony » (point de non retour) ka azo inoana fa hitroatra ny Malagasy ary hiredareda ao am-pony indray ny fitiavana ity Tanindrazana ity ary tsy hanaiky ho zana-hana olona frantsay iray indray. Toy ireo mpamadika sy nivarotra an'i Madagasikara tamin'ny mpanjanaka

ny taona 1947 ireo mbola minia mikimpy ary mivarotra sy mamadika indray ity Nosy ity sy ny Malagasy, ka manohana sy mandrisika ny frantsay ho fidiana indray. Tsapa avy amin'ny fahitana ny fihetsiky ny Fitsarana Avo momba ny Lalampnanorenana dia heverina fa tsy vahaolana ny fisintonana ny antontan-taratasy firosahan'ireo kandida 8 nanao fanambarana satria mbola loza no hitranga raha hambaran'ny HCC fa azo ekena ny firosahan-dRajoelina Andry Nirina. Araka izany dia ho fantatra anio izay ho lazain'ny HCC ary inoana fa tsy handrarak'ilo mby an-doha ny Malagasy tena tia tsy misy fepetra ity Nosy ity, ka hanohitra izany amin'ny fomba rehetra ary hiandry sy hanaraka izay toromarika homen'ireo kandida tsy manaiky vazaha hitondra ny Firenena Malagasy izany. Inoana ihany koa fa tsy ny eto an-drenivohitra ihany no hanohitra izany fa ny any amin'ny Faritra rehetra izay nofitahin-dRajoelina Andry Nirina rehetra, ka tsy ho latsa-danja noho izay ataon'ny Malagasy any Frantsa amin'ity andro ity. Niaraha-niaina ny zava-doza novolen-dRajoelina Andry Nirina teto amin'ity Firenena Malagasy ity. Nanjanaka nandritra ny enimpolo taona teto Madagasikara i Lafrantsa kanefa niaina ara-dalana ihany ny Malagasy ary maro ny fotodrafitrasa napetrany na dia nanana endrim-panandevozana tamin'ny alalan'ny "Smotig" aza ny natanterahana izany. Tato anatin'ny folo taona naha teo amin'ny fitondran-dRajoelina Andry Nirina kosa dia fanandevozana niaro fandrohana ny harem-pirenena sy famitahana ny Malagasy ary fanitsahana ampaladia ny Fiandrianam-pirenena no nasetriny ny fampindrana ny Malagasy azy ny fahefana. Tsy maintsy hesorina eny amin-dRajoelina Andry Nirina sy ireo tandapa izany fahefana nampindrana azy ireo izany, satria toy ny horirika namonosan-kena izy ireo ka ny fonosin-do, ny mamono lo rahateo.

Andry Tsiavalona

ROMY VOOS ANDRIANARISOA

Nandà ny fiampangana azy, miverina any am-ponja hatramin'ny 6 febroary 2024

Momba ny resaka kolikoly iraisam-pirenena, niakatra fitsarana omaly tany Londres renivohitra Britanika ny raharaha Romy Voos Andrianarisoa, talen'ny kabinetran'ny filoha Andry Rajoelina teo aloha. Toy izao ny fizotran'ny fitsarana omaly io. Tokony ho natao tao amin'ny rihana faha-5 izany raharaha izany tamin'ny 11 Ora. Tamin'ny 10 ora, nampidinina tao amin'ny rihana faha-4 efitra faha 9. Nanomboka tamin'ny 11h40 vao teo nanomboka ny fakana am-bavany. Nisy malagasy 50 teo no tonga fa tsy tafiditra daholo tao amin'ny efitra. Nisy avy any Frantsa sy ny ny tao an-toerana : Angletera, nihiaka ny tsy rariny misy aty Madagasikara. Nandritra ny fitsarana, notononina ny vesatra iampangana an'i Romy ary nanontaniana izy raha niaiky fa meloka na tsia. Tsy niaiky ny heloka niampangana azy izy : « I plaied not guilty, » hoy izy nandritra izany. Nomen'ny tribunaly omaly



Ny sasany amin'ireo Malagasy niatrika ny fitsarana an'i Romy omaly, tany Londres.

ny daty izay hiatrehany ny fitsarana manaraka dia ny 6 febroary 2024 izay haritra herinandro. Mandrapahatonga an'io

daty io dia hisy ny fifanakalozana ny antontan-taratasy amin'ireo voakasika amin'ity raharaha ity. Noho izany, miverina any

amponja ny voampanga hatramin'io datin'ny 6 febroary 2024 io.

Ny Valosoa

Aleo Resahana, Anao ny sehatra.

TV Record

Ho vahiny voalohany anio ny gazety Ny Valosoa sy ny Free FM



Izy 3 mianadahy hiseho voalohany amin'ny fandaharana « Aleo Resahana. Anao ny Sehatra. »

Namokatra fandaharana vaovao ny TV Record Madagasikara, fandaharana halefa isaky ny sabotsy amin'ny 8 ora alina. Izany fandaharana vaovao izany dia nampitondraina ny anarana hoe : " Aleo Resahana . Anao ny Sehatra ". Hivahiny ao anatin'ny fandaharana anio alina ny mpanao gazety Franck Rasamizany avy amin'ny radio Free FM sy ny mpanao gazety Arphine Rahelisoa mpanao gazety, sady talen'ny famoahana ny gazety Ny Valosoa Vaovao. Mpanentana ny fandaharana ny mpanao gazety Manohiarivony Rivo Manoa . Ny asa fanaovan-gazety sy ny fifidianana no ho loha-hevitra amin'izao fandaharana voalohany izao, fa hisandrahaka amin'ny loha-hevitra sy ny sehatra samy hafa : toekarena, sosialy, sy ny maro hafa ihany koa izany fandaharana izany hoy ny tompon'andraikitra amin'ny fandaharana manaraka ho avy.

Isambilo

TONONKALO

Ampy izay ry ingahy filoha

Ivereno tadidiana ireo rehetra izay nambarany Tao anaty dimy taona nitondrany firenena, Dia ho tsapanao daholo fa hay lainga tsisy farany Izay no hany nisongadina , niampy fandokafan-tena !

'Ndeha jereo ny tetikasa , inona no mba nitsangana ? Aiza ilay « tanamasoandro » noventesiny an-kabary ? Ny hany tsapan'ny vahoaka : vidim-piainana midangana Toy ny vary iray kapoaka lasa valonjato ariary !

Iretsy nosy manodidina izay haverina amin'ny gasy, Hay dia tena rediredy namitahana vahoaka , Fa ilay filoha nivadika ho vazaha an-taratasy, Izay no tena zava-nisy nampandoa sy nampihoka !

Iretsy lalana voalaza fa hamboarina sy harenina, Aiza izao ankehitriny no tsy misy mbola miainga ? Mandiniha sy mihevera, saina tsara izay tenenina, Hay tsy anarana entim-poana ilay anao ry Rainilainga !

Ny orinasam-panjakana , miharitra ny mahamay Fa tena mitsipozipozy sy eo an-dalam-pialana aina, Izao no mbola hotohizana amin'ny dimy taona indray ? Sanatria dia sanatria, meteza isika ho tonga saina !

TSIMIMALO (07-09-23)

PRIERE AU SACRE CŒUR



Que le Sacré Cœur de Jésus soit loué, adoré et glorifié à travers le monde pour des siècles et des siècles, Amen.

Dites cette prière 6 fois/ jour pendant 9 jours et vos prières seront exaucées même si cela semble impossible. N'oubliez pas de remercier le Sacré Cœur avec promesse de publication quand la faveur sera obtenue. Remerciements au Sacré Cœur pour faveurs obtenues.

Harena A.